

宋

史

翼

宋史翼卷二十二

諸授縣丞嶺南巡廣東南道運使通國縣高唐通判建寧提司鹽法道副級臣陸心源輯

列傳第二十二

循吏五

郭份

黃榮

李大訓

吳炎

曾噩

汪大定

桂萬榮

幸元龍

張方

麋深

子昇

羅博文

陶崇

張汝明

曾治鳳

吳懿德

楊長孺

宋慈

李義山

樓大年

陳景魏

吳一鳴

木天駿

陳琥

謝子強

陳介

孫嶸叟

李申巽

郭份字仲質新淦人甫冠中進士爲辰州道州南雄  
州教授湖南轉運司幹辦公事湖南自軍興治戰艦  
積材於場久而腐敗相承募丁守視份白之臺毀材  
爲薪歲省衣糧萬計官有羨緒數十萬議獻諸朝份  
曰此非可繼也使耆爲止醴陵有豪族取民田治宮  
室上流有古陂輒徙之田以蕪廢訟數十年不息份  
以地比與圖視之一訊而決還陂於上流溉田如初

用轉運使黃鈞等薦擢通判常德軍常德爲湖北望  
郡更二守無善狀份至委曲扶持之靖獠千紀王師  
討之份主督運山行旣艱而水道經若水寨遡流百  
餘里尤險惡漕幾不通份命輕裝淺舟水陸並進軍  
用不乏師還第功擢守興國軍嘗因賜對建言常德  
當夷獠出沒之衝比年復有茶寇之警屯兵才二百  
人不足以彈壓湖北一道北被邊南控溪峒城壁皆  
不治非所以備不虞請以荆鄂千人戍常德而諸郡  
城惡者亟治之卒年五十七

朱子撰郭  
公墓誌

黃犖字子邁分寧人庭堅之族孫以父彩郊恩補將

仕郎除主吉之龍泉簿吉大邦田租之輸累巨萬計  
姦弊總總郡檄莅之始至吏或密請使令犖瞪視之  
請不置訪其故乃前此有吞其飲器之餌拱手聽所  
爲莫敢誰何者一日復請犖數之曰爾謂我不知耶  
吾不欲暴前官之短耳爾亟去無污我擇愿吏平槩  
量除常歲多取之虐人情大悅會邑長病郡俾兼領  
葺學宮增弟子員立程蔡呂先生祠示學者以趨向  
創大豐陂溉田二萬頃慮其久且廢也買田十畝山  
九百畝以備修築之費立長若副分番掌之以均工  
役之勞隄防周密遂爲長利侍郎孫逢吉深歎美之

爲識其事以詗來者嘗出見民有空舍老嫗臥其下  
旁無一物屋猶堅壯心疑焉使人問故嫗曰兒買人  
將鬻此廬以就婦舍嫗弗忍也甘此獨臥攀驚歎曰  
詎有此風耶立逮其二子俱來一囊且瘁一壯而悍  
者買人也攀曰此豈待拷掠而得其情哉欲置之法  
嫗以天性之愛祈免甚苦買人亦痛自刻責請後不  
敢因其機而訓飭之母子于是不睽劉清之以比古  
循吏篤于風教者述其事於詩以美之再調汀州連  
城令縣國有松老而連理攀名之曰義松取庭堅翊  
貞觀義松之作圖而刻之邑人歌頌謂德政所召改

宣教郎知湖州歸安縣近輔劇邑巨室有訟理不直而以私請一斷以法僧爲惡少所誣脅取財物無以自明立伸其枉女巫遊仙夫人者誑惑寓公達于官府則判其謀云信巫不信鑿此愚俗之病衣冠右族豈宜淪胥淫祠不毀蠹民益甚迺杖其人而盡取其土木偶投洪流中及其他挾邪術惑民聽者一切蕩刷無遺類巫風遂息旣解印貧尼其歸僦居郡治之側吳興士大夫敬之不替部使者交薦遷司農寺丞大宗正丞除大理正浙西提舉常平茶鹽召爲郎中遷大府卿除淮南轉運副使兼提刑加秘閣修撰嘉

定四年卒年六十有一觀風浙右之日有蘇師孟者  
黃緣師且補官占一卒養私馬於官廐犖沒入之黥  
其黨親爲吏而犯法者師且雖含怒犖弗顧也生平  
不治產業惟法書名畫古器物是好一日得山谷帖  
數十卷值千金傾橐而償之對客卷舒津津喜見眉  
睫曰吾不貧矣詩律字體祖述山谷而時出新意大  
字尤奇壯東宮欲見之書中庸大學以獻雜著二十

卷介軒詩詞三十卷

潔齋集黃公行狀

李大訓字君序福建閩縣人父士龍仕至奉直大夫  
直祕閣老居里中後生考德問業者應之無倦色黃



幹嘗賢士龍謂其於窮通榮辱之變泊如也大訓初以父蔭補同安縣丞縣奸豪受民賦與吏相表裏賦不以時入大訓課吏籍其姓名與所受之數按籍以索不擾而辦轉吉州廬陵縣丞適大旱獄囚淹滯提刑司檄大訓慮囚有以峒寇繫者七十餘人大訓鞠得正犯十餘人餘皆平民官軍掠之以邀功獄具上捕盜者力爭庭下大訓正色曰將官殺人軍前則獄官不得與今旣付獄是非曲直當聽有司君安得輒爭乎所活五十餘人有尹四者或謂賊酋不當釋大訓辨其非後數日果有執尹四而至者人乃大服峒

寇猖獗勢連湖廣萬安邑連寇境大訓攝其事密調  
義丁戍兵備之賊不得逞而去郡委大訓往湖南議  
夾攻之策潭帥曹彥約喜其材留大訓偕行討賊迄  
事始歸調贛州安遠令會吉之龍泉尙有負固跳跟  
者監司交辟大訓知縣事既至招集流亡一意撫摩  
朝廷蠲兩稅大訓復奏寬年限大軍徹戍大訓謂不  
可無備請置隴頭寨以捍外寇留戎兵五百以護縣  
郭人情始安青草明坑二峒素桀驚或議勦之大訓  
曰獨不可理論乎招其酋長十餘人至具勞之諭以  
禍福皆泣謝去曰李知縣非欺人者相與勒石筍峯

頌大訓德且誓不敢負用薦者改知惠州歸善縣事  
省俗醕治以安靜舊時衣冠喪葬無復品節爲文戒  
之俗爲一變嘉定十二年卒於官大訓篤志伊洛之  
學非其類不交鄉鄰罕識其面居官所至以廉謹稱  
倥偬則力事功閒暇則修禮教論者謂其儒而不懦  
吏而不俗云

黃勉齋集李  
知縣墓誌

吳炎字濟之福建邵武人登紹熙元年進士乙科調  
桂陽軍教授環軍皆猛炎不鄙夷其人講切磨濯絃  
誦彬彬旁境聞風多來學者地遠且貧士或不能偕  
計吏炎積餘廩哀眾力置貢士田前相余端禮判潭

州與湖南諸監司合薦於朝詔與掌故京秩嘉泰二年除戶部架閣遷武學學諭開禧元年改太學博士時韓侂胄專國炎不樂官京師乞補外添差建寧府通判

詳見宦績

請祠主管台州崇道觀初炎與麗水章良

肱同朝相善嘉定初良肱弟良能拜御史中丞舉炎自代被召詣闕而良能已除參政問炎所欲炎曰食議幕之祿足矣良能曰吾何辭以白吾兄遂除知江陰軍時方更楮法吏奉行新例甚峻炎陛辭極論其弊且曰民心向背社稷存亡繫焉開邊挑敵曩嘗失天下之心矣奈何更持不恤之論行一切之政稽令

者斥干令者誅大吏倡之小吏迎之臣恐人心動而國勢隨之矣別疏言士風饕墨宜復祖宗治賊吏舊法引公儀休毛玠事以諷當軸之貪者詞旨剴切無所顧避前一日所親任希夷在詞掖詣炎商對語炎拒不答疏出希夷始大愧服江陰以邑爲郡歲入常不給賴柏稅支吾後改稅務隸嘉興炎請復之寬征嗇用以其餘力葺郡學貢闈繕築黃田開資民灌溉治績爲浙西諸郡之最七年除監温州炎固請小壘改知興化軍復以老乞休主管崇禧觀改千秋鴻禧觀十四年卒年六十有九官至朝散郎炎少敦學長

宦遊所入皆以奉尊老均兄弟色睟而莊言簡而遠  
若甚和易而有毅然不可犯者終其身不汲汲進取  
歷仕二郡自下車奏記時宰外比去不再通名其清  
介恬靖出於天性也子垠蔭授通直郎知甌寧縣

劉後

村集吳  
君墓誌

曾噩字子肅福州閩縣人癸丑登第筮尉瑞州再轉  
監行在惠民局時權臣用事噩恬於下位開禧丙寅  
兵興費倍攝封樁庫感慨獻箴大書于壁辭警而切  
寓意諷諫識者矚之改宣教郎知泉州晉江縣嘉定  
乙亥改監左藏東庫夏旱應詔六言事在職二年除

軍器監主簿遷大理寺丞攝司直三月多所平反嘗  
太息曰人貴知足遂求外補出刺湖州葺學宮重建  
韓昌黎趙忠定之祠民聽翕然斥興利之說蠲坊場  
之逋摧斂之亡藝者如近城三十里之市征海陽女  
戶丁米之類一切革去聽斷精明吏不容欺人有以  
死罪誣訴詎察其情不爲急追未幾果獲人皆歎詎  
之明潮俗以人命同貨賄犯重辟者惟賂鄉保邑胥  
十無一聞于郡殺人不復死視以爲常武斷橫行寬  
氣莫伸詎力革之自是不濫死朝嘉治最擢將漕  
本道寶慶二年三月終年六十詎七歲能屬文有江

吞天上月之句自少至老未嘗一日廢卷有義溪集  
十卷班史錄二十卷通鑑節要十三卷諸子要語左

氏辨疑等書

陳密復  
齋集

汪大定字季應慶元府鄞縣人大猷弟寧宗時知江  
州事江州素號名郡自征賦弗辦又耗於游士之干  
請至是帑藏遂不盈萬緡而負諸司之錢幾二十萬  
官兵俸給亦積至萬五千大定矍然曰腴民膏血而  
使往來者挹取之以邀虛譽吾不忍爲也會照申游  
謁之禁大定奉行尤嚴凡有挾而來者止謝以尊酒  
或恐由此起謗不爲動謹朱墨節浮費屬邑舊逋盡



蠲貸之不數月而用粗足補解諸司十七萬緡吏俸亦以次支給治獄仁恕懲惡黨禁嚴姦盜爲之屏迹

慶元四年罷歸次池陽得疾卒

樓鑰攻媿集

桂萬榮字夢協慈谿人慶元二年進士授餘干尉邑多豪右一裁以剛介而御小民以慈愛秩滿調建康司理尋通判平江時守朱在政尙嚴刻因鹽課拘繫甚眾萬榮具書告在不從乃挾行狀與所拘人同寢在愧卽委縱遣焉陞守南康檢吏奸省浮費征税以法進直秘閣遷尙書右丞奉祠

咸化四明郡志

幸元龍字震甫高安人慶元進士初尉京邑時万俟

高之孫與岳飛家爭田歲久不決府檄元龍裁斷積  
案如山元龍並不閱視卽擬云岳武穆一代忠臣万  
俟高助僧逆賊雖籍其家不足謝天下尙敢與岳氏  
爭田乎田歸於岳卷昇於火時論體之改知當陽縣  
擢通判郢州忤吏彌遠劾令致仕紹定辛卯秋京師  
災彌遠私第獨存元龍自家上封事云天火曰災人  
火曰火陛下卽位以來虛已以聽宰相若火出於天  
臣知宰相獲罪於天若火出於人臣知宰相獲罪於  
人且言彌遠負甯考付託竊陛下威福使天下知丞  
相不知有天子願陛下戮其首以謝天下籍其家以

則天下然後斷臣之首以謝彌遠則災自弭矣明年

卒子溥中嘉定進士廉介有父風知鬱林

人物志

張方字立義資陽人慶元己未進士以宣撫使程松  
薦詔赴都堂審察未行留權制置使準備差遣入爲  
國子監正轉太常博士以祖父母老除嘉定府尋改  
果州丁祖父母憂復補邛州眉州提點夔州利州成  
都各路刑獄兼四川制置使參議始召見卽上疏曰  
更化之美浸淪於初立國之勢益趨於弱天變未弭  
民怨益深邊鄙若小康而亂本未戢盜賊若小寧而  
奸黨未除及去國又曰陛下坐朝無所咨謀聽事無

所可否百官無所勸勵四方無所視瞻今日之事卒以偷歲月之暫未足以致理而爲久安之圖己卯金人入漢中勢張大危急又言漢中三年兩罹侵擾如隄再潰如器再壞吾蜀唇齒之國不容一失朝廷近所施置去取有類於棄蜀者三焉又條上急務六事皆勁挺無所忌諱及言大本大綱大勢大務指陳澈切觀者咸爲之惴栗上竟優容之及主漢中臬事更復山河堰蠲民錢至三十萬緡有奇米二千餘斛追賁死節二人給田以贍其孥及興元末張福作亂陷利州掠閬州果州四川大震又與魏了翁移書宰執

謂安丙不起則賊未卽平蜀未定詔丙爲宣撫民心始安建白合類省試遂事分上庠生員十五合試西蜀之士中選者卽升之於學嘗以嘉定寶璽地恩官其弟莊莊尋亦決科兄弟自爲師友作心箴以自警刻銘座右有曰敬安肆危勤逸怠勞皆有微言進刑部郎官直秘閣詔赴任以母老辭御史論其矯激黨附遂奉母還其鄉治精舍築圃屋集鄉之秀士日與講習論說游息於其閒爲人廉明剛介見義必爲三作州三持節所在有聲號亨泉子有亨泉遺稿一百

麋溧字子長吳縣人初以郊恩授如皋尉登慶元五年進士第改和州司戶參軍嘉定七年知廣濟縣崇庠序督課試邑苦役法溧諭民自得差次率無橫擾獄訟衰止講行荒政勸率富民得椿積三萬緡告糴旁近米值頓平又請於秋苗外別置義倉出公帑糴米儲之謂之官社有田於鄉者更勸出粟謂之民社各廩於鄉每一鄉爲兩倉擇鄉所推信者三人掌之謂之社長又聚穀於倉每春量丁口多寡許鄉民借貸秋成每石取息二斗耗五升以折庸賃之費五年息及本則歸本於主又五年息又及本復以息之半

酬之民社旣豐則賑糴以還官社仍再糴以實穀廩  
焉其區畫事目凡十條編次成帙上之於州州鏤版  
下屬邑且爲申訴旌賞洎去官民泣送至百里外爲  
立生祠通判吉州臨安府差監察御史首論苛玷臺  
列輕儇妄庸之人又論年來受納秋苗之弊詔下諸  
路轉運鏤版禁約理宗卽位除右正言奏畏天悅親  
講學仁民四事又論邊備宜蓄威望以開重寄示恩  
信以服義旅廣招刺以固邊障便收糴以省漕運又  
論賞罰之弊及官屬泛濫請從省罷科目具文請定  
限制三軍招刺請先擇子弟差役紛爭乞主義役時

臺臣請上謁原廟議自溧始也又上定規模正紀綱  
振起人才肅清官列擇監司守令選將帥愛民強兵  
八事詔舉賢能首薦丹陽劉宰溧在臺諫所劾十一  
人悉當其罰寶慶初除宗正少卿明年改太常少卿  
尋乞外任除直顯謨閣浙東提刑俾郡縣各置代厯  
以絕欺蔽劾治屬吏之故縱失入留獄任情者三年  
詔兼本路常平以疾轉朝議大夫秘閣修撰致仕卒  
年五十六贈銀青光祿大夫溧學問充實性稟純厚  
謙退孝友恪守清介臨政勤敏立朝正色有循吏之  
風大臣之節其居諫職不肯順旨劾真德秀由是去



國名重當世

虛志

弇字仲昭慄次子以父致仕恩調崇仁丞知山陰縣  
邑苦催科弇釐正稅長所收不趣而辦移丹徒縣先  
是縣官接送凡納堂日用百需悉出於吏吏並緣爲  
姦名曰納錢里正破產不能支春夏之交輒預借苗  
錢民重困弇首嚴納堂之禁催科則設匭使自投繳  
民不復用一錢又每都置人直縣給里正紫袋俾往  
來有公事吏不得下其手舊有折麥折羅二錢弇併  
爲一遇旱輒躬自檢實不以屬吏由是執役戶或終  
歲不入縣門諸司交薦由淮東安撫機宜通判陽州

改江東安撫司參議知建昌軍歷大府寺丞改度支  
郎官輪對首奏畏天愛民講學修政求賢聽言六事  
上問近日貪風未革弇乞獎廉首以陳壇陳昉對尋  
兼權右司時丁大全陰奪政柄弇守正不阿出知台  
州州有鬬卒驕蹇日甚弇密訪倡亂者上制司誅之  
一州棍伏卒爲大全所中罷去除侍左郎中遷尙書  
右郎中弇在銓衡人皆憚於私請尋罷去除將作監  
淮東總領兼知鎮江府圍田租取斛面尤甚弇至悉  
從寬減舊買軍需取贏率三數年後方能追及倍稱  
之息囚繫多死者弇抑不行力請宣限支給恆使有

儲聲績甚著久之差知安吉州改知吉州繕城郭甃  
闕路作竈聽葺浮梁以濟不通州人名曰廉公橋詔  
兼提舉江西常平景定五年卒年五十九昇性孝友  
睦族恤貧傲范公義莊規約所至吏不能欺豪右屏  
跡立朝議政尤知大體平居奉養清約燕游玩好絕  
不留意

盧志

羅博文字宗禮一字宗約福建沙縣人祖畸見文苑  
傳父彥溫知甌寧縣博文甫周歲家人示以晬盤博  
文扶服取性理書展玩久之畸作文以記其事且喜  
曰是兒當以文學大吾門十餘歲喪父用祖蔭授福

州司戶參軍嘉泰二年第進士調靜江府觀察支使  
郡爲嶺徼以西一都會常時幕府已不勝煩博文裁  
處從容各得其理是時秦檜專權士大夫竄斥南來  
者相踵博文悉善遇之廩奉竭則鬻衣服以濟其乏  
改知贛州瑞金縣始至歲欲先事儲備及饑發廩賑  
贍厝置纖密吏莫敢以出入欺復請推其餘以及旁  
縣全活甚廣縣故多盜博文飭巡徼設方略得渠酋  
數人寘諸法境內帖然張浚都督江淮辟爲幹辦公  
事博文舊從同郡李侂遊侂聞其就辟也喜謂朱子  
曰張公高明閎大而宗禮以精密詳練佐之幕府無

過事矣孝宗嗣位覃恩轉通直郎賜五品服浚使募  
兵江西和羅建康皆有成績及浚再入相賓客例出  
幕府除知和州未上而吏部侍郎汪應辰制置全蜀  
奏辟博文爲參議官應辰虛心好問博文亦推誠啟  
告成都政績最天下嘗銜命漢中撫勞將士帥司以  
禮遺錢三百萬博文辭不獲命還次漢州州方治貢  
院博文以五十萬予之餘悉輸成都公帑取河南三  
程遺文與他名臣論奏纂述可以垂世者募工鋟版  
用之略盡橫渠張載子孫避地流落貧不自振博文  
訪得之爲言應辰延置府學俾蜀士知所勸乾道四

年秩滿丐祠主管台州崇道觀命下而應辰亦召還  
博文與之俱行至嘉州而卒年五十有三博文沈靜  
寡欲年未三十卽屏遠聲色一榻蕭然惟樂善不倦  
聞天下之士有一言一行之幾乎道不遠千里求之  
視人患難困乏如切於身救之必盡其力旣得侗所  
授河洛之傳喟然歎曰儒佛之異無他公與私之間  
耳由此沛然自信守之益堅朱子嘗稱畸以清德重  
天下而博文復能以道學行誼世其家云

晦庵集羅  
公行狀參

汪文定集羅  
宗約墓誌

陶崇字宗山金州人十歲能賦筆山詩有驚人句登

嘉泰二年進士第歷仕兩廣召試館職募柳子厚爲  
文嘗撰宋繞歌鼓吹曲及楚詞七敘以進於朝理宗  
在潛邸時崇爲講讀官龍飛被召陳保業謹微慎獨  
持久之說又陳郡縣修武備厚民生厲士氣之論與  
時宰史彌遠忤出知信州終於任有澈齋文集贈特  
進諡文肅子夢訓興春陵瑞陽兩郡終監丞

文載

張汝明

邵武志云舊志張作謝非

字晦叔福建興化人嘉泰二年

進士歷彬州宜章令邑有飛虎軍調馭頗難汝明結  
以恩信遂帖服武靈侯廟巫數十輩號神老妖言惑  
眾每迎奉涉水濟託言神不樂從橋入邑令必避堂

居否則大災民爭獻牲幣恐後汝明諭眾曰神欲民  
安不宜令民濟水令與神分理幽明神宜居寺舍祭  
在誠不在物其以蔬果奠神老恚謂災且及令汝明  
聞之下神老於獄誠曰災則熬汝以謝神老皆泣拜  
具伏邑竟無災遷通判漢陽軍時行公田法汝明躬  
閱四郊雨雪不渝以故吏不得通賕而稅以償被檄  
董築黃州城汝明建議城外磨旗山敵至可瞰城中  
請築外城環之黃州民賴焉辟四川總領司幹官卒  
於道

福建通志

曾治鳳字君儀晉江人開禧元年進士歷官富陽縣



章州通判將作監知袁州除直煥章閣知廣州兼安撫使性簡儉愛惜公帑一毫不以妄費不嗜殺戮寇發循惠聞郡請其捕追不從必諭降之端平二年進直徽猷閣改知建寧會戊卒挺亂薄廣城時已解印引咎丐罷奉祠數年卒

廣東通志  
參閱書

吳懿德字夏卿處州慶元人嘉定二年進士英州教授知玉山縣改知新會時縣久無正官弊端如毛民狃于訟且瀕海多盜縣不能制懿德至縣事無鉅細必親時新令至蠶戶有給由錢受訴牒有酷息錢一切罷去凡士族之流寓與憚獨顛連無告者廩其食

春賦貧民錢粟夏則和藥施之雖溝澮亦時濬治其  
誠于民皆此類以廉介有聲辟通判廣州未及拜而  
卒將沒前二日書於冊曰平生薄宦甘受凍飢一介  
不取一毫不欺嘗稱晉刺史吳隱之于縣東以勵來  
者邑民謂其清白可尙遂配享焉西山真德秀誌其  
墓甚稱重之

粵大記

楊長蘧字子伯別號東山潛夫以蔭補永州零陵主  
簿嘉定四年守湖州彈壓豪貴牧養小民政聲赫然  
郡之士相與畫像祠于學宮除浙東提刑累官至廣  
東經略安撫使知廣州事每對客曰士大夫清廉便

是七分人矣嶺南羣吏獨有長孺清白著于時有詔  
獎諭謂其清似隱之故長孺賦詩有詔謂臣清似隱  
之臣清原不畏人知之句改安撫福建真德秀入對  
寧宗問當今廉吏德秀以長孺對端平中以忤權貴  
劾去加集英修撰致仕紹定元年起判江西憲臺尋  
以敷文閣直學士致仕年七十九卒郡人立像與吳

隱之合祠

黃佐廣東通志  
參鶴林玉露

宋慈字惠父福建建陽人父鞏以特奏名授廣州節

度推官

闕書作州廣州今  
陳後村居士集

慈少受業於同邑吳雄雉

本未于弟子慈因得與楊方黃幹李方子諸儒論質

學益進暨入太學真德秀衡其文謂其源流出肺腑  
慈復師事焉嘉定十年中進士乙科補贛州信豐主  
簿會南安軍三峒賊煽亂提刑葉宰懲前招安養禍  
決意剿除辟慈充準備差遣官時副都統制陳世雄  
擁重兵不進慈亟趨山前先賑六保饑民使不從亂  
乃提兵三百爲囑總倡破石門寨俘其酋世雄恚輕  
進逼賊巢賊設覆誘之將官死者十有二人世雄走  
贛州賊得勢益猖獗慈欲用前賑六保之策白宰數  
移文提舉常平司魏大有大有聞慈主議銜之慈率  
義丁力戰破高平寨擒謝寶崇降大勝峒曾志皆渠

魁也賊平幕府上功特改合入官宰去大有攝提刑  
挾忿庭辱慈慈不屈拂衣而出語人曰斯人忍而復  
必召變大有怒劾至再三慈遂罷歸未幾大有爲卒  
朱先所戕閩中汀劍邵盜起詔擢陳韓爲招捕使德  
秀貽韓書言慈可用韓奏雪慈前誣復元秩命與李  
華同議軍事王祖忠督淮西軍至閩以慈書生謾與  
約分路尅日會老虎寨祖忠與華以全師渡明溪慈  
提孤軍從竹洲進且行且戰三百餘里卒如期會寨  
下祖忠驚曰君忠勇過武將矣由是軍事多所咨訪  
慈先計後戰所向克捷直趨招賢招德以扼賊鋒祖

忠與華遂得進破潭飛潔賊酉邱文通挾謀主吳叔  
夏劉謙子竄入石城之平固慈與偏將李大聲疾馳  
平固執以歸招德賊徐友文謀中道掩奪慈併俘以  
獻大盜無漏網者汀卒囚知州陳孝嚴搜城負因韓  
檄慈圖之慈至梟首亂者七人出旗勝貸餘黨眾無  
敢譁韓奇其才薦知長汀縣詳見端平二年樞密使  
曾從龍督師江淮辟慈爲屬未至而從龍卒詔令荆  
襄督臣魏了翁兼其職了翁遺書幣趣慈賓主權甚  
每曰賴有此客爾尋通判邵武軍攝郡有遺愛改通  
判南劍州守臣宰相李宗勉以慈應詔入境問俗歎

曰郡不可爲我知其說矣強宗巨室始去籍以避稅  
終閉糴以邀利吾當代謀之析人戶爲五等上者半  
濟半糴次糴而不濟次濟糴俱免次半受濟下者全  
濟之全濟之米從官給眾皆奉令民無餓者累遷提  
點廣東刑獄粵吏多不奉法有留獄數年未詳覆者  
慈下條約立期程閱八月決辟囚二百餘復以時循  
行部內雪冤禁暴移任江西兼知贛州贛民遇農隙  
率挾兵械販鹺於閩粵境上所過剽掠州縣莫敢誰  
何慈麟次保伍譏其出入姦無所容臺諫奏取慈所  
行下浙右諸路以爲法除直祕閣提點湖南刑獄條

上大理諸蠻事宜詔除韓爲湖南安撫大使兼節制  
廣西韓辟慈參謀事無大小多與商權然後行會鬼  
國與南丹州爭金坑南丹說言蒙古逼境望乞師慈  
白於韓曰北兵無非越大理特摩二國直擣南丹之  
理已而果然進直煥章閣知廣州爲廣東經略安撫  
使威愛相濟嶺海晏然煇祐六年卒年六十有四贈  
朝議大夫御書墓門以旌之蓋異數也慈博記覽善  
辭令據案執筆一掃千言丰裁峻厲望之可威然不  
以己長傲物雖鰥生小校寸長片善提獎如恐不及  
性無他嗜惟喜收異香名帖而疏食糲袍蕭然終身



劉克莊謂其可與辛棄疾相頡頏焉

劉後村大全集宋公墓志

李義山字伯高豐城人知成州修己之子嘉定十三年進士授大宗正兼金部輪對言爲善不可有疑心去惡不可有悔心并陳進善不能無疑者三去惡不能無悔者三由是罷出知吉州後以湖南提舉攝帥漕楚俗尙鬼有妖覲譚法祖假禍福惑人義山曰此張角孫恩之漸也斬法祖燬其祠厯階至中正大夫所著有後林遺稿思過錄

參江西通志

樓大年字元齡義烏人登嘉定十六年進士令南昌治先教化建利去病洞察民隱有殺其讐者賂給其

甥就辟甥自陳殺人狀甚悉大年疑之縣丞與府錄  
事受賕使焚屍以滅跡大年正色抗辨上之憲臺推  
官重讞事始白民敬之生爲立祠及去攀轅留者綿  
數十里遷奉議郎通判吉州提刑李迪以大年廉慎  
命錄一道滯囚未幾攝郡事江東大姓查氏據幼弟  
貲產六十萬爭訴二十年不解大年舉張詠決子壻  
爭財故事命歸其弟人以爲允歲終吏白公帑錢粟  
羨餘前官例納大年斥之以助軍餉及周宗室之貧  
者尋陞朝奉郎卒官年七十

宋文憲集

陳景魏福建南安人知柔從孫以蔭補信州鉛山主

簿歷廣州新會丞擢贛州會昌令石城寇竊發景魏請於郡守乘機掩捕破其寨擒其酋餘黨悉平改知潮州潮陽縣縣歲輸丁銀至郡例增耗曰錠頭錢景魏曰此小民無窮之害亟裁去及解郡守謂不如例盡械邑吏景魏曰令裁之當罪令守乃釋吏尋召提轄文思院出知惠州決疑獄剔蠹胥案牘一清惠經兵燬後公私未立景魏痛節緒修復學宮官廨以餘力葺白鶴故居合江樓六如亭歲大饑上言民瘼未瘳乞減惠民糴米三之一改知韶州以言者罷主管雲臺觀起知英德府白於帥請增治洗口戍兵以防

搖寇帥不從未幾搖覆洽洗始如其策增戍開慶元

年卒年七十有七積階至朝散大夫

福建通志

吳一鳴字伯大福建將樂人紹定五年進士爲潭州  
益陽縣尉帥李華聞其賢置幕中政事一委之復薦  
於朝累調德化令時康維新帥漕或謂之曰例三司  
歲得舉其屬一人公何獨不薦新曰留以待賢或曰  
賢者爲誰曰吳一鳴也卒薦之得調長樂詳免宦績始至  
見倉庫蕭然詢知其縣多上官寄苗糧官不敢督責  
故耳因歎曰官自我得之自我失之何憾時參知政  
事陳偉在朝一鳴撻其幹督糧甚急幹以告偉偉曰

令爲誰曰南平吳一鳴也偉曰南劍亦有此人耶由是諸勢家聞之悉爲輸納乃廣學舍修官廨邑人作歌頌之邑有廬尙書者被劫得賊所遺刀一鳴悉召縣之鐵工出示之一工曰此某所作也命諸工還獨留詢之所爲作者乃泉州巨賈之徒也一鳴以計獲之一訊而伏後爲仇家所誣去任邑人號哭於道執政知其非罪復調臨安府簽判時樞密鄭清董修大內疾作諭一鳴之賢遂委代之官終浙東安撫司主

管機宜

福建通志

木天駿字德遠温州瑞安人與陳敷良同里得其緒

餘登嘉熙二年進士第初教授永州發明張南軒之學以淑士知閩縣有政聲後守建昌郡人包恢居政府族子倚勢漁獵小民天駿入境卽達至縣竄之邦人撰錄記其事知饒州除大宗正丞通攝考工諸曹卒博學能文尤工駢騷

萬厯溫州府志

陳琥字少嚴一字恕齋福州連江人寶祐元年進士開慶初知南豐縣痛繩羣吏嘗曰民不得安者吏爲之蠹也取巨猾吏曰三陳者斷手足以令於是胥吏皆股栗不敢肆百姓歡呼載道有問之者曰公以恕齋自號而竟不恕何也曰吾恕於民耳吏可恕乎識

者以爲名言

建昌府志

謝子強字強學永嘉人登進士第由州縣升內職寶祐四年帥廣東律己以廉牧民以惠束吏以法己未廣右繹騷八桂開制閩供億取辦於民邊聲警甚處之裕如民不知有西師因浚城池團保伍爲備禦計簡靜不擾海邦晏然市田以增學費兼領泊事四年廣人歌頌德政余復亨爲之記立像與吳隱之楊長

孺並祀

郡志

陳介字方叟福建永清人初遊同邑陳藻門年十三不以場屋爲意人問故介曰吾早孤母子相依爲命

何忍一日離膝下母喪服除始就舉開慶元年擢進士乙科時丁太全當國介廷對語切直考官懼而抑之調衛州司戶始至卽卻砂地梗繡例錢秋場受納每石有買口錢三猪介笑曰口可買少可買平擯去之果殺軍閥郡守誅其渠涵涵未已委介詣營撫諭眾歡然曰是不受錢司戶吾曹敢不聽命其議死獄也必爲囚者求活死者求寃曰庶幾兩無憾也常山邑寇作介登陴守捍禦當寇所必攻事平辭賞格不受歲旱禱雨久未應介白於郡守曰旱之虐者天政之虐者人減五邑賦天必雨守弛其半雨立應在職



三年四易守寬猛雖不同介隨時救正守無不敬重  
者秩滿擬以幕職辭不就外移潮州判官

福建通志

孫嶸叟字仁則餘姚人第進士擢監察御史論賈似  
道罪重法輕當斬以示國法德祐初元兵渡江文天  
祥起義勤王而右相陳宜中深結留夢炎奏勿使入  
衛以沮毀之天祥列上勤王及留屯利害皆內忌夢  
炎莫敢關白嶸叟取所列徑造御前奏之復乞倚任  
天祥竄宜中夢炎及黃萬石呂師孟以作忠義之氣  
時朝議方倚重師孟求好於元不報嶸叟居官竭忠  
盡智排斥奸回不爲身謀官至禮部侍郎卒諡忠敏

兩浙名  
賢錄

李申巽宋末知上猶縣事忠愛廉謹深得民心丙子  
冬元兵攻城申巽率居民死守元使來諭降申巽與  
民李梓發等誓曰邑未城以前遇變民輒散避今有  
城矣吾民富資以其守若前人建城後人以城降於  
義曷可乃堅守至七十五日城陷申巽死之路帥張  
伯子及梓發皆死時晴空不雲而雷識者疑爲星隕  
云

江西通志  
嘉靖牋志

宋史翼卷二十二終

男樹

韓校字

宋史翼卷二十三

諸授蘇太尉戴高遠廣東觀察使權道南廣道權福建觀察使高麗使通國  
臣陸心源輯

列傳第二十三

儒林一

朱成

阮逸

士建中

黎涪

劉顏

王開祖

劉牧

倪天隱

單錡

兄錫

吳孜

朱臨

范柔中

周行已

蕭楚

馬大年

何兌

王普

曹粹中

應虎臣

陳長方

李 樗

宋咸字貫之福建建陽人先世洪州南昌人父樂守太子中舍致仕徙居建陽縣生數子皆殤妻江氏謂樂曰積善餘慶今生子不育無乃父母有所闕與姑自修而已未幾生成總角好書不同羣兒其母每謂樂曰此子必興宋氏司勳郎中江拯咸母外家叔父也知南劍州母命咸往受業不數年學大成登天聖二年進士乙科知尤溪縣累官知邵武軍慶厯元年除太常博士知瓊州瓊僻在海外舊未置學咸奏請設學賜經史以變夷風從之集諸生讀五經於先聖

廟建尊儒閣暇日親爲講授置學田以資膏火由是州人始知力學初咸在尤溪時上官以積憾故遣爪牙吏伺其所爲將加以罪及至瓊亦如之聞者以爲憂其母曰吾兒志大廉決無私事爲人所得不足憂也旣而果然母喪服除知韶州州兵卒多驕悍難制咸以嚴治之俱帖服皇祐中狄青經制廣西薦爲轉運判官邕州賊平以勞轉職方員外郎仍留任尋遷轉運使嘉祐六年交趾與甲峒蠻寇邕州詔經略使蕭固發諸郡兵赴邕州咸及提刑李師中議掩擊之已而師中劾咸黨附知州蕭注坐追官勒停仕終都

官郎中咸莅官所至有聲性耿介不肯阿人以取容  
竟以蜚語爲師中所彈然非其罪也後注起用而咸  
已卒論者以不得盡其才爲憾云

福建通志

阮逸字天隱福建建陽人天聖五年進士調鎮江軍  
節度推官

閩書作鎮東軍

景祐初詔天下有深達鐘律者所

在以名聞知杭州鄭向言逸通知古樂上其所撰樂  
論十二篇并律管十三召詣闕命同禮賓副使鄧保  
信湖州鄉貢進士胡瑗校定舊鐘律逸專主分方法  
取上黨秬黍大者累度求尺製黃鐘之律復進周禮  
度量議詔翰林學士丁度等詳考得失度等言逸以

大黍累尺小黍實龠自戾本法而度量議欲先鑄嘉  
量然後取尺度權衡法亦疏舛不可依用右相韓琦  
復論逸與瑗保信所造鐘律違經乖古逸乃上言臣  
前蒙召對言王朴律高而李照鐘下竊觀御製樂髓  
新經歷代度量衡篇言隋書依漢志黍尺制管或不  
容千二百或不啻九寸之長此則班志已後歷代無  
有符合者惟蔡邕銅龠本得於周禮遺範邕自知音  
所以只傳銅龠積成嘉則是聲中黃鐘而律本定矣  
謂管有大小長短者蓋嘉量旣成卽以量聲定尺也  
今議者但爭漢志黍尺無準之法殊不知鐘有鈞石

量衡之制臣所以獨執周禮鑄嘉量者以其方尺深尺則度可見也其容一鬴則量可見也其重一鈞則衡可見也聲中黃鐘之宮則律可見也既律管量衡如此符合則制管歌聲其中必矣臣見鑄成銅甌欲乞再限半月更鑄嘉量乃取李照新鐘就加修整務合周制鐘量遺法復下度等參定度等皆以爲非詔悉罷之然猶鑄造推恩除逸鎮安軍節度掌書記康定元年入爲太子中允上鐘律制議并圖三卷慶厯初遷太常寺丞三年始置武學以遷爲武學教授已而學廢改兼國子監丞尋爲睦親宅教會與宗室倡



和逸有易立泰山石難枯上林柳句怨家造逸謀不軌方下吏治而逸復坐他事遂除名勒停竄遠州皇祐二年將祀明堂言者以爲鑄鐘特磬未協音律復召逸赴大樂所同太常寺定鐘磬制度明年十二月鑄成召兩府及侍臣觀新樂於紫宸殿賜名大安然逸視舊樂止下一律而鐘聲舛鬱震悼不和滋甚五年詔南郊姑用舊樂其新定大安樂惟用之常祀及朝會逸以製律成復勒停爲戶部屯田員外郎既而翰林學士胡宿言新樂未施郊廟先用於朝會非先王薦上帝配祖考之意仁宗以爲然逸樂遂不復用

福建  
通志

士建中字熙道鄆州須城人天聖慶厯中以高行達  
學顯于時孫復講學于泰山建中同時而起復之所  
推重建中爲第一而石介其次也復贈介詩曰攘臂  
欲爲萬丈戈力與熙道攻浮譎又嘗薦之范仲淹石  
介所服膺自復外惟建中其集中與蔡副樞書稱其  
器識備而才用足智慮周而宇範遠識時運知進退  
言必信行必果安貧守節非其義一介不取非其人  
未嘗與之往還廉介清慎不屈權貴不畏強禦施之  
于用王佐才也建中所著言帝王之道則有道論明

性命之理稱仁德之貴則有壽顏論報善惡之本窮  
慶殃之自則有善惡必有餘論大聖人之言辨注者  
之誤則有思聖人言論舉五常之本究禍福之謂則  
有原福上下篇明鬼神之理存教化之大則有原鬼  
篇守正背邪遠近趨遠則有隨時解達聖人之時廣  
夫子之道則有夫子得時辨擇賢養善警姦除惡則  
有莠辨累官評事知魏縣官至尙書兵部員外郎學

集士補之墓誌石介

徂徠集與蔡樞副書

孫衮字補之在方技傳中

黎澍字希聲四川廣安人幼務學旣冠與仲兄洵游  
京師當時儒宗石守道孫明復皆美其才慶厯六年

進士調利州節度推官除成德軍觀察推官監延州折博務轉大理寺丞改殿中丞知閬州南部縣遷太常博士屯田員外郎歐陽修薦爲學官得國子監直講是時太學生凡千數諸博士講解先日撰口義升座徐讀而退無復辨旨要洎獨不然置經于前按文釋義聽者樂聞其說守雅蜀眉簡四郡皆先德後刑務存治體不汲汲簿書期會君子喜其勸小人畏其懲有古循吏之風在唐安乘歲饑募民完堤堰兩得其利不殍而稔洎專經而信道常謂春秋緣舊史之文假聖師之筆行王者之事其文坦易其法簡嚴思

之不必太深求之不必太過則有得乃探索蘊奧敷暢厥旨著春秋經解十卷大率以經爲主不汨於異家曲說之紛紜傳諸士林信之深從之衆熙寧初丞相韓琦上其書於朝謂可置文館翰林王禹玉輩援之甚會貢舉更制春秋不爲科議乃寢元祐八年卒

年七十九

淨德集黎公墓誌

劉顏字子望彭城人也少孤好古學不專章句師事高弁舉進士第以試祕書省校書郎知龍興縣坐事免久之授徐州文學居鄉里教授數十百人採漢唐奏議爲輔弼名對馮元劉筠錢易蔡齊上其書除任

城主簿歲饑發大姓所積粟活數千人李迪知兗州  
青州皆辟爲從事終青州觀察推官博學知道爲世  
大儒有器業可巨用及卒門人考其德義謚明道先  
生著儒術通要經濟樞言復數十篇石徂徠見其書  
歎曰恨不在弟子之列子庠宋史有傳

淨德集劉庠墓誌徂徠集

參宋元學案

王開祖字景山永嘉人學者稱爲儒志先生皇祐進  
士不仕杜門著書從學常數百人復以薦召試賢良  
方正未赴而卒開祖見道最早所著有儒志編言復  
者性之宅无妄者誠之原又言學者離性而言情奚

情之不惡又曰使孔子用于當時則六經之道反不如今之著又言由孟子以來道學不明今將述堯舜之道論文武之治杜淫邪之路開皇極之門吾畏天者也豈得已哉其言如此是時伊洛未出安定泰山徂徠古靈諸老甫起而開祖之言實遙與相應永嘉後來問學之盛蓋始基之惜其得年僅三十有二未見其止爲可惜也

宋元學案

劉牧字先之號長民衢州西安人年十六舉進士不第曰有司豈杜我哉乃買書閉戶治之及再舉遂爲舉首調州軍事推官與州將爭公事爲所擠幾不免

及後將范仲淹至牧大喜曰此吾師也遂以爲師仲淹亦數稱牧勉以實學因得從學于泰山之門巖終將舉京官牧以讓其同官有親而老者仲淹歎息許之曰吾不可以不成君之美及仲淹撫河東舉牧可治劇于是爲兗州觀察推官改大理寺丞知大名府先是多盜牧卽用其黨推逐有發輒得後遂無爲盜者有詔集其強壯刺其手爲義勇多惶怖不知所爲相率欲亡走牧諭以詔意爲言利害皆刺欣然曰劉君不我欺也通判建州富弼以樞密副使使河北奏掌機宜文字保州兵士爲亂弼使撫視牧自長垣三



日抵其城下定之會弼罷去乃之建州連丁內外艱服除通判廬州朝廷弛茶榷使江西議均其稅奏事得請人皆便之除廣南西路轉運判官修險阨募丁壯以減戍卒徙倉便輸考攝官功絕其行賕居二年凡利害無不興廢者乃移荆湖北路至踰月卒家貧無以爲喪自棺槨諸物皆荆南士人爲具牧旣優于學復優于才又爲范仲淹富弼所知一時士大夫爭譽之牧亦慨然自以爲當得意已而屯邇流落抑沒于庸人之中幾老矣乃稍出爲世用若將以有爲也而卽死掄材者爲之悵然牧又受易學於范諤昌諤

昌本于許堅堅本于种方實與康節同所自出其門  
人吳祕黃黎獻也祕上其書于朝黎獻序之卦德通  
論一卷鉤隱圖三卷先儒遺論九事一卷  
臨川集九十七劉君墓誌參宋元學案

倪天隱字茅岡桐廬人古靈先生妹婿學者稱爲干  
乘先生所述周易上下經口義十卷又繫辭上下及  
說卦三卷安定講授之餘欲著傳而未逮天隱述之  
以非其師之親筆故不敢稱傳而名之曰口義官至  
縣尉晚年主桐廬講席弟子千人其爲桐廬令葉安  
道作題名記戒之令師善懲惡無爲石羞時人傳之

彭汝礪翻陽集參景定嚴  
州續志嚴陵集宋元學案

單鏐字季隱金陵人藉於常之宜興少有志操從胡  
瑗肄業頗見推重長益邃於學著詩易春秋義解博  
覽諸家之說斷以胸臆它經及子史皆手自抄纂篇  
秩盈庋筆扎細楷幾若摩印其爲文務辭達事舉不  
喜浮靡論議衮衮可聽尤能言吳中水利以爲荆溪  
當宣歙廣德下流東注震澤而震澤自吳江入於海  
今江隄連亘水勢壅閼古人濬治遺跡堙塞殆盡誠  
能通海浦溝港以道吳江增江隄橋梁以決震澤又  
復故百瀆以疏荆溪則積水皆下譬如人身去鯁於

嚼口腹通矣有獻其說于朝者事下部使者使者誘  
鍰按行鍰察其屬忌之辭弗往性樂易遇人傾蓋如  
故聽言置虛實一切傾信久知其玩謔弗愠也客至  
無疎戚留飲醉輒假寐頃刻已醒未嘗爲酒困間有  
所感賦詩見意崇寧中慕容彥逢憂居里閭鍰過其  
居日三數雖大雨雪聞外有履聲曰此必季隱也旣  
而果然時年七十有餘矣相見慰勉已必自敘所得  
經傳新意大編長卷常以自隨據案風誦援筆改竄  
大觀四年卒年八十

慕容彥逢摛文堂  
集單季隱墓誌

兄錫第嘉祐

二年進士明陰陽圖緯星厯讀書無不該貫與東坡

爲同年進士坡愛其賢以女兄之子妻之來宜興每寓其家錫卒坡祭以文從子發舉八行科有風土記傳於世

昆陵志十七

吳孜會稽人嘗從安定胡瑗學名馳於嘉祐治平間會郡謀建學孜卽舍宅爲基今學有祠堂存焉初學成太守張伯玉至以便服坐堂上孜鳴鼓行學規伯玉欣然受其罰王十朋題其祠云右軍宅化空王寺祕監家爲羽士宮惟有先生舊池館春風歸在杏壇中

會稽續志

朱臨其先家吳興五季避亂遷浦陽臨少穎悟從安

定胡瑗游瑗以明體適用之學教東南人士或治經  
或治事各有條法長樂劉彝授周禮又兼習水利臨  
乃授春秋瑗嘗著春秋辨要惟臨得之爲精臨晚年  
好唐陸淳學淳之師啖助趙匡嘗會三傳而取舍之  
淳遂總其說爲纂例辨疑二書臨謂孔子沒千有餘  
年說春秋者皆膠於偏見無有出淳書之右者雖董  
仲舒爲兩漢通經第一然猶拘於穀梁不克別白餘  
可知也其所學蓋卓卓有所見如此臨初以丞相呂  
公著薦入官歷宣德郎守光祿寺丞以著作佐郎致  
仕後子貴贈正議大夫所著春秋記二百餘篇他詩

文又別有集藏於家

浦陽縣志

范柔中字元翼江西南城人元豐八年進士累官宣  
教郎太學博士其學長于春秋著春秋見微十卷折  
衷三傳去取諸家深得聖人之意元符二年三月詔  
求直言柔中上書多詆紹聖併及熙豐之政且獻所  
著春秋見微坐停官雷州羈管入黨籍選人邪上尤  
甚第一人崇寧五年敘復承務郎依舊致仕仍不許  
放還紹興五年以晏敦復言贈直秘閣與一子官繫  
要錄參九朝編年楊仲良長  
編紀事本末江西人物志  
周行己字恭叔永嘉人也學者稱爲浮沚先生少而

風儀秀整語音如鐘讀書十行並下遊太學時新經  
之說方盛而行己獨之西京從伊川遊持身艱苦塊  
然一室未嘗窺牖嘗作顏子不貳過論曰過不必大  
毫末萌于心而天地爲之應悟不必久斯須著于心  
而天下歸其仁伊川稱之曰是子早達然憂其速退  
豐稷爲司業一日騶從闕下堂下行己上書規之稷  
爲巽謝時兩賢之成元祐進士求監洛中水南糴場  
以便從學行己未達時從母有女母所屬意嘗  
有成言而未納采至是其女雙瞽而貴人欲以  
女女之行己謝曰吾母所許吾養志竟娶之愛



過常人伊川常語人曰某未三十時亦不能如此崇  
寧中官至太學博士願分教鄉里以便養親尋授齊  
州教授發明中庸之旨此邦始知有伊洛之學大觀  
三年御史毛■劾行己師事程氏卑汙苟賤無所不  
爲遂罷歸築浮沚書院以講學宣和中除祕書省正  
字卒于鄆所著有周博士集三十卷與許景衡劉安  
上安節戴述趙霄張惲沈躬行蔣允中稱元豐九先  
生

萬厯温州府志參浮沚集

蕭楚字子荆廬陵人自號三顧隱客紹聖中遊太學  
貢禮部不第于時蔡京方專國楚慨然引還移門人

馮澥書謂蔡凶敗國將爲宋王莽澥得之驚後始證其不狂楚誓不復仕遂退而著書明春秋之學自漢唐迄宋春秋家且干皆癖于傳而楚則獨斷于經著春秋辯疑行于世大旨爲權姦柄國而發而持論正大實有合尼山筆削之義獨醒雜志門人胡銓以春秋登第歸拜牀下楚告之曰學者非但拾一第身可殺學不可辱毋禍我春秋乃佳嘗有友坐誣繫大庾獄楚冒暑往救終得不寃人皆道其義楚性嫉惡至抗聲纓數不少恤及見善則談不去口建炎四年卒年六

十七私諡清節先生

澥菴文集清節墓誌銘參獨醒雜志

馬大年字永卿

案廣信志作馬永卿字大年

揚州人元城弟子也

大觀三年進士聞元城謫亳州寓永城縣之回車院大年時赴永城主簿其舅高郵張桐薦使求教既至見元城雄偉闔爽談論踰時體無欹側肩背聳直聲不稍動手足亦不移自是從學二十六年當紹興六年追錄其語爲元城語三卷

揚州志

何兌字太和福建邵武人重和元年進士授廣南西路提點刑獄檢法官歷知興化縣建炎初殿中侍御史馬伸撫諭荆廣見而賢之辟爲屬官伸本程頤門人兌遂從伸受學先是金人陷汴京脅百官議立張

邦昌伸時爲監察御史不肯書名勸中丞秦檜上書  
金帥尼瑪珎乞存趙氏檜從之邦昌旣僭立金人挾  
檜北去伸排日申狀邦昌斥使避位速迎康王邦昌  
爲之氣沮高宗卽位右正言鄧肅嘗論朝士臣邦昌  
者例貶二秩伸不辯也伸歿兌嘗輯其事狀藏於家  
及檜南歸當國兌通判辰州欲上其稿子鎬固諫曰  
俟檜死上之未晚兌曰不然萬一我先死馬先生忠  
節不彰矣暝目有餘恨徑取所輯事狀達尙書省且  
手書陳伸不汚邦昌僞命屢請復辟有功檜初自謝  
靖康時議他人莫預見事狀有敘及伸建謀語大怒

下兌荆南詔獄辭皆出吏手坐上書不實削官編管  
英州檜死復官還里語所親以馬先生事得白爲快  
一笑病廢奉祠逾年卒兌從伸得頤中庸之說踐習  
不懈以終其身鄉人目爲中庸何公

福建通志

王普字伯照福建閩縣人登宣和三年進士歷太常  
博士紹興初輔臣請以太牢祭祀天地普言故事惟  
大饗明堂用太牢乃止用犢四年遷國子監丞上明  
堂典禮未正者十一事其一謂陶匏用於郊卽玉爵  
用於明堂今明堂實兼郊禮宜用陶匏他日正宗祀  
之禮乃奉玉爵其二謂禮經太牢以牛羊豕爲序今

用我將詩先羊豕而後牛所謂以辭害意者其三謂  
陳設尊罍宜倣周官司尊彝秋嘗之制其四謂泛齊  
醴齊宜代以今酒而不易其名其五謂三禮圖祭器  
不合於古請用政和新禮改造其六謂冕服衣裳舊  
式欲並正訛謬一從周制其七謂皇帝未後詣齋室  
則是致齋二日有半乞用質明以成三日之禮其八  
謂齋不飲酒茹葷行事官宜勿給酒饌俾得專心致  
志交於神明其九謂設神位版及升禮奠冊不當委  
之散吏其十謂古者既作詩從而歌之然後以聲律  
協和而成曲自歷代至於本朝雅樂皆依此法崇寧

以後乃先製譜後命詞於是詞律不相諧協與俗樂無異乞仍倚詞製譜其十一謂黃鐘堂下之樂大呂堂上之樂郊祀皇帝版位在階下故還位之樂當奏黃鐘明堂版位在階上則還位當歌大呂今明堂祀不下堂而襲郊祀例並奏黃鐘之樂於義未當詔下禮官討論施行尋轉太常寺丞普復奏言宗廟之制與禮不合僖祖非始封之君而尊爲始祖太祖實創業之主而列於昭穆其失自熙寧始宣祖當遷而不遷翼祖旣遷而復祔其失自崇寧始謹案禮經太祖卽廟之始祖是廟號非謚號惟我太宗嗣位之初太

祖皇帝廟號已定雖夏曆朝世次猶近每於祫享必  
虛東鄉之位以其非太祖不可居也臣謂自僖祖至  
於宣祖親盡之數當遷自太宗至於哲宗昭穆之數  
已備宜奉太祖主居第一室永爲廟之始祖每歲五  
享告朔薦新止於七室三年一祫則太祖正東向之  
位太宗仁宗神宗南向爲昭眞宗英宗哲宗北鄉爲  
祫五年一禘則迎宣祖神主享於太廟而以太祖配  
焉宣祖皇帝實生太祖當爲禘主無可疑者如是則  
典禮經無復前日之失矣先是起居舍人董弅嘗  
言是諸詔侍從臺諫過防秋集議及普疏入乃趣禮



官參詳後二日高宗謂右僕射趙鼎曰太祖開基創業始受天命祫享居東鄉之位普所言不可易也既而臣僚議有異同卒不行十一年權都官員外郎明年普安郡王出閣普奉詔同吏部太常各官議禮尚書吳表臣等謂國本未立當從厚以繫天下望遂取皇子出閣例上之高宗不悅詔責表臣等討論典禮不詳具祖宗故事普坐是并罷十九年添差通判邵州普素爲秦檜所嫌數歲不遷丐祠主管台州崇道觀檜死始起提舉江南東路常平茶鹽公事三十二年召除禮部郎中轉對論取士分科之弊以爲後生

舉子競習詞章而通經老儒存者無幾望詔有司將  
國學及諸州解額各以三分爲率其二以取經義其  
一以取詩賦仍於經義中優取三禮春秋庶幾兩科  
可並行而無偏廢之患事下禮部國子監看詳申衙  
書省逾月擢太常少卿孝宗受禪假工部侍郎充送  
伴大金報登寶位國信使還朝卒普經術湛深議論  
淹貫朱子嘗評福州前輩明禮者三人普最優劉藻  
次之任文薦又次之

繫年要錄參宋史  
禮服志福建通志

曹粹中字純老號放齋定海人也李莊簡公尤之增  
宣和六年進士釋褐黃州教授秦氏欲因莊簡見之

辭焉私語婦曰尊公其能終爲首揆所容乎已而莊  
簡果被出嘆曰吾媿吾壻粹中自是隱居終秦氏之  
世未嘗求仕莊簡退居著讀易老人解說而粹中箋  
詩各以其所長治經可謂百世之師矣張魏公晚年  
入相薦于朝通守建寧不久乞身而歸贈侍講宋元  
學案  
彪虎臣字漢明湘潭人父約孝友渾厚聞有言人過  
失者則掩耳去之虎臣以經術教授學者爭迎致天  
性和易而教尙方嚴以不欺爲本以孝弟爲先以文  
藝爲後故從之者不徒務進取有所畏而不爲青人  
張所早遊京洛聞二三先生緒論所至志訪求人物

宜和中興教長沙遣其壻就學遠近士子益依歸焉  
號爲鄉先生卒年七十五子居正彪君墓誌受業胡文定  
之門

陳長方字齊之福建閩縣人父旽長方少孤奉母客  
吳中依外祖太僕寺卿林旦以居杜門勵學家貧不  
能置書借鈔至數千卷聞著作王蘋得程顥兄弟之  
傳遂以父旽遺訓爲請蘋器重之一日讀論語至參  
乎吾道一以貫之喟然歎曰六經之書淵深浩博無  
踰此一言矣因榜所居曰唯室年十八敘伊洛答問  
謂二程得絕學於千五百年之後學者當由斯言而

體之於身御史中丞許景衡見而詫曰眞陳後之之子也建炎初工部侍郎楊時請祠南下長方往謁之時留與語且曰子之學知至而行未至故志剛而氣勁行其所知則剛勁不足爲子道矣子其勉之紹興六年以布衣應詔上劄子諳諳以嚴師律備長江謀漕運爲急復因朝廷罷趙鼎任張浚作里醫一篇諷之大略謂國家欲起痼疾必固元氣補當持重攻當相機其言深中浚輕躁僨事之病八年擢進士第調太平州蕪湖縣尉縣多猾吏驚獄舞文長方訪其尤者繩以法一縣肅然民有兄弟互訟長方教以子弟

戒而遣之兄弟雍和無復爲隙用薦關陞佐從政郎  
補江陰軍學教授謂親朋曰教官惠不及民幾於尸  
素要當育人材使聞孔孟之道庶足以報吾君置官  
設學之意也未行以疾卒朱子稱同時學者多舉其  
字惟於長方必曰唯室先生蓋頗引以爲重云弟少  
方孝宗朝爲東宮講官時號二陳

福建通志

李樗字若林福建閩縣人與兄桷俱受業於呂本中  
後領鄉貢其學以孝弟忠信窮經博古爲主及門士  
多渾厚質實志尙修潔黃幹嘗稱之曰吾鄉之士以  
文辭行義爲後進宗師若林其傑然者也學者稱迂

齋先生  
福建通志

宋史翼卷二十三終

男樹麟校字